

• ДАНЪЯСЬКЫМОН



**Тодмо удмурт кылбурчилы
но журналисты Т.Н. Черновалы
15-тй толсуре 70 арес тырмиз**

Котырес лыдпусаз – дуно кузьымен

Та нылкышно пичи дыръяз аспөр-тэмлыко но паймымон льоль малпанэн улэм. Синмаськыса но паймыса учкылэм балеринаос, тужгес но Майя Плисецкая, шоры. Бадзым будыса, балерина, пе, луо. Ачиз но Пазял клублэн сцена вылаз «поръяса» оскалтэм. Оскисько, балерина но луыны быгатысал...

Но улон солы мукет кузьым дасям. Удмурт кун университетын дышетскыкуз ини, зэмос кылбурчи луон сярысь малпаськыны кутске. Озыы кылбураны быгатонлыкез ворме балетэз. Берлогес, трос аръёс ортчыса, льоль малпанзэ быдэстйз нунокез Ката Деметер, эктйсь луиз. Валады ни, луоз, кин сярысь вераны турттйсько. Со удмурт нылкышно кылбурчи, дано журналист Татьяна Чернова.

15-тй толсуре Татьяна Николаевна котырес арлыдзэ пусйиз. Алёна но Настя нильёсыз, анайзылы сйзьыса, Ижкарысь йёскалык библиотекаын пумиськон жйт радъязы. Мыным но отчы вуылыны, кылбурчиез зечкыланы шуд усиз.

Зура черкогуртын вордскем, Пазял гуртын будэм Татьяна Чернова понна та интыос одйг кадь дуно но мусо пото.

«Гондыркуш – кёкые,

Валодур – азбаре...»; – гожтэ со одйгаз кылбураз.

– Вордйськем пальёс – Вало нёжал но Курбусы, Меркан но Вильгурт, Жамавыж но Агайпивыж – номырин воштонтэмесь. Отысь инкуазь, калык пыраклы сюлэме пычаса кылемын, – вера Татьяна Николаевна.

Та жйтэ юбилярез уно кузьымъёсын шумпоттйзы. Но тужгес но бадзым кузьым лэсьтйз ачиз Татьяна Чернова: котырес арлыдзэзлы сйзьыса, «Пазыылске-а Пазял» книгазэ поттйз. Со быдэсак сйземын Пазял гуртлы, отын азьвыл но та вакытэ улйсьёслы. *«Татысь калык котку но висьяськылйз вань ужъёсыз дэмен но гурак чюш лэсьтэменыз. Пёртэм вакытьёсы пужит тёлъёс тус-тас карыны, шератыны вырылйзы ик калыкез, но гурт возиськиз, али но со будэ, паськыта»,* – пусье книгагыз автор.

Шумпотйськом но данъяськиськом, Татьяна Николаевна, ми но тйледын огвакытэ улйськом, тйляд лёгам сюрестйды ветлйськом шуыса. Тйляд творчестводылы луыса, пазяльёслэн нимъёссы яркытгес но даногес адзисько.

**Ольга ЧУВАШОВА,
Пазял гурт**